



Kamis, 26 Desember 2024
Ogen: 1 Tesalonika 1:1-3



Kubagikan Arah Tulisen



Paulus, Silwanus ras Timotius nuratken tanda tedeh ate ras pengerganna nandangi perpulungen si setia i Tesalonika. Telu kalak si malang man Tuhan enda nuduhkan pengataken bujur si mbages kal man Tuhan erdandanken perpulungen Tesalonika, la saja itotokenna i bas pertoton, tapi perpulungen Tesalonika ipujina erkiteken pelayanan, kiniteken, usaha keleng ate ras ketekunenna bas erpengarapen. Kerina perasaan ras keleng ate ituduhkan kalak enda arah tulisen si seh asa genduari jadi sumber inspirasi ras motivasi mbue kalak si tek.

Kita perlu nuratken pengalaman geluhta ras Tuhan, selaku bahan kesaksinta. Adi situlisen jadi buku, ntah bentuk puisi, cerita, komik banci jadi alat si ipake Tuhan lako mengembangkan dirinta. Denggo siidah uga hebatna Tuhan ngajarken perbahanen mbelin i bas masa-masa si nggo lepas. Menulis e jadi sada terapi kecemasan diri. Lit sada buku isuratken arah pengalaman pribadi, penulisna, judulna, "Karya Suci Ratu Kamar Gelap". I bas buku enda nuriken uga penulis ergumul i bas kamar gelap, e me sada ruang isolasi si la banci kena matawari, ras Dibata ngenca ibahanna jadi temanna. Kai pengalaman-pengalamanna isuratkena jenari ipepulungna jadi sada buku. Tulisen-tulisenna erbahanca kita jadi kalak si megeng-geng ras bijak ndalani kegeluhen.

Arah erbahan tulisen banci kita tambar kreatifitasta, membangkitken kecerdasen, erbahanca perukurenta sistematis, reh nukahna siakap ndungi persoalen, selaku alat terapi ras nampati i bas nuduhkan perasanta. Marilah sibagiken arah tulisen, teptep wari kerna kesangapenta ban Tuhan Jesus e. Ban arah story wa, facebook, ntah media social siapai pe kerina kiniulin Tuhan si enggo sialoken. Maka e jadi kesaksinta kerna Tuhan sierkeleng ate i bas geluhta teptep wari.